



A. d. 672

y Carion, Jr.

mebr 2) - 5)

MF (1-5)

3
Computus Ecclesia-
sticus,

Gewisse Kir-
chenrechnung / Aus den
Schriften der Heiligen Pro-
pheten vnd Apostel/wie es eigentlich
uber frome vnd böse Leute
zeitlich vnd ewiglich
wittern solle.

Gestellet / Durch
Sigismundum Sueuum
Freistadiensem,

Wittenberg.

1574.

Siegmund Schwabe

[Faint, illegible text, likely bleed-through from the reverse side of the page]

[Faint, illegible text, likely bleed-through from the reverse side of the page]

[Faint, illegible text, likely bleed-through from the reverse side of the page]

[Faint, illegible text, likely bleed-through from the reverse side of the page]

[Faint, illegible text, likely bleed-through from the reverse side of the page]



Dem Ehrn=
vhesten / Wolweisen / vnd
Namhaften Herrn / Ludwig
Pfinzig / des Raths zu Breslaw /
Meinem günstigen Herrn
vnd guten Freunde.

Gottes Gnad Fried vnd
Segen / durch Christum / Amen.

Herrvhesten gros=
günstiger Herr vnd
Freund / es sind frei=
lich die schönen Liech=
ter des Himmels / Sonn / Mond
vnd Sternen / nicht vergebens
geschaffen / vnd die jenigen / so
vleißig *Astronomiam* studiren / im
rechten brauch nicht so gering

A ij

zu

zu achten / wie sie bey vielen un-
wissenden vnd vnachtsamen
leuten in der Welt gehalten wer-
den / denn je neben der heiligen
Schrift / auch die tegliche erfa-
rung genugsam bezeuget / das
die Lichter des Himmels vnd der
selben vleissige *obseruationes* sehr
nötig vnd nütze / vnd deshalb
hoch zu achten / darzu lieb vnd
werd zu halten sein.

Denn erstlich dienen sie zum
Augenscheinlichen beweiß vnd
zeugnis / von Göttlicher verse-
hung / das ein Gott sey / der alle
ding wol geschaffen habe / auch
gar weislich / ordentlich / vñ wol
regiere vnd führe / nach seinem
willen vnd wolgefallen. Wie
des *Eobani Hessi* Vers lauten.

Esse

*Esse Deum quicumq; negat, mox sidea
ra spectet,
Sidera qui spectat, iuratis esse De-
um.*

Zum Andern/die ganze Welt
zu erleuchten / allen Thieren vñ
sonderlich den Menschen / das
Natürliche Liecht zu geben / we-
ge vnd stege zu weisen / ohne wel-
ches sie sonst im Finstern umb-
walzen müsten / wie *Heraclitus*
saget: *Ni Sol esset, perpetuae tenebrae
essent.* Wenn keine Sonne we-
re / so were es stets finster / des
wir an der Nacht ein mercklich
Bilde haben.

Zum Dritten / dienen sie:
Tag vnd Nacht zu unterschei-
den. Wie im 136. Psalm geschrie-
ben stehet: **Der H E R R hat**
A iij **gros-**

grosse Liechter gemacht / Die
Sonne dem Tage fürzustehen /
Den Mond vnd Sterne / der
Nacht für zu stehen .

Zum Vierdten / geben sie
nach irer art vnd neigung / allen
irdischen Creaturen / mancher-
ley eigenschafften / kreffte vnd
wirckungen / doch also: das die
Menschen mit irem Verstand
vnd Willen an des Gestirne In-
fluentz vngewunden sein / dabey
diese Regel zu mercken: *Astra in-
clinant, sed non necessitant* . Das
ist: Die Gestirn haben wol ire
art vnd neigung / Aber Gott
hat es alles in seiner Hand / das
ers alles kan endern vnd schi-
cken / nach seinem willen vnd
wol gefallen / welchs zu wissen /
darz

darzu dienen / 1. Das wir nach
anzeigung des Gestirns / vnserer
gesundheit vleissig warnemen /
2. Vnd weil sie offters böse nei-
gungen zeigen / desto mehr Gott
fürchten / 3. Unser leben wol an-
stellen / 4. Vnd fleissig beten /
mit dem lieben David sagen /
Psal. 31. HErrre meine Zeit ste-
het in deinen Henden / vnd da-
bey den trost mercken / *Ierem. 10. A
signis caeli nolite timere.* Das ist:
Seid nur from vnd Gottfürch-
tig / so dörfft jr euch nicht fürch-
ten / für den zeichen des Himmels.
Darauff auch des Herrn Phi-
lippi Melanthonis seligen schöne
Verss zeigen. (*rat omni,
Qui sapit, ille animum fortunæ præpa-
Præuisumq̄ potest arte leuare malū.*)

A iiii das

Das ist: Wenn vernünfftige
leute sehen/das sie von natur zu
was argem geneiget sein / oder
inen sonsten ein vnglücke dres-
et/so halten sie sich in guter acht/
vnd seind geflissen / durch Got-
tes wort vnd ordentliche Mittel
dem argen zu steyren.

Zum Fünfften / wird durch
das Gestirn auff das Gewitter
gezeiget / Wie Christus selbst
meldet/ Matth. 16. *Rubet caelum
mane, tempestas erit.* Morgen rot /
felt in Rot / Abend rot / schön
wetter bot/das aber dem *Practi-*
canten die Kunst nicht allwege
gleich zusagt / ist die vrsach/das
sie nicht alle gleich der kunst recht
erfahren seind / auch wol die aller
besten *Mathematici* zu zeiten feh-
len /

len / denn vnser HErr Gott an
das Gestirn vngewunden ist /
sondern dasselbe in seiner Hand
füret / nach seinem Willen vnd
Wol gefallen .

Zum Sechsten / Seind off-
ters die Liechter vnd Sternen
am Himmel / sonderliche Zeichen
vnd Vorboten des zorns Got-
tes / vnd folgenden straffen / da-
von der HErr Christus saget /
Luc. 21. Es werden Zeichen ge-
schehen / an Sonn vnd Monde.

Zum Siebenden / sind auch
schöne Zeichen vnd Bilde / des
Menschlichen lebens / Wie die
Gestirn iren ordentlichen lauff
haben / vnd alle Planeten sich
nach der Sonnen richten / also
soll es auch auff Erden in allen

U v sten

Stenden fein ordentlich zu gehen/ das sich alle menschen nach der Sonnen der Gerechtigkeit richten/ Nemlich/ Christum für iren einigen Heiland können anrufen/ vnd ehren/ vnd ein jeder seinen Stand vnd beruff zu Gottes lob trewlich verrichten lerne.

Zum Achten/ seind die Liechter des Himmels auch darzu dienend/ Auff das die jar / zeit vnd Feste vnterschiedlich vnd in guter ordnung gehalten werden / Psal 104.

Aber wo man allein nach Heidnischer weise nach dem Gestirn gaffet / vnd nicht viel mehr in der Schrift forschet / so wird bey zeiten der Himmel finster/ vnd
vn=

unbekand / das man nicht weis
wens tag oder nacht ist. Denn
wie kan das Auge recht sehen /
wo das Herz stock finster ist:
Derhalben sollen wir für allen
dingen / die Planeten in der Bi-
bel / nemlich / die Schrifften der
Heiligen Propheten vnd Apo-
stel ansehen / vnd vnser rechnung
darauß stellen. Sollen nicht so
falt von der Schrifte *iudiciren* /
wie *Galenus* vnd andere *Epicurej* /
die da sagen: *Mosen multa affirma-
re, sed pauca probare.* Das Moses
viel dinge herrlich preise / aber
wenig beweise / Wider welchs
wir mit dem HErrn Christo sa-
gen: *Luc. 16.*

Mosen habent, viuo plenos spiramine.

vates,

Quos.

*Quos audire pijs si nolunt auribus,
actum est.*

Das ist: Sie haben Mosen
vnd die Propheten / mit reichem
Geist vnd Gaben / Wer die nicht
wil haben / noch hören / mag im-
mer hinfaren / als dem weder zu
raten noch zu helfen siehet. Wer
aber fürnemlich auff Gottes
wort siehet / im dasselbe beband
vñ nitze machet / dem wird auch
das Gestirn vnd Gewitter / sein
Licht vnd Nutz geben.

Eben auff diese meinung /
habe ich auch gerichtet meinen
Computum Ecclesiasticum, vom Ge-
witter des Tages *Conuersionis*
Paulj / Auff welches viel Leute
ganz abergleubischer weise gaf-
fen / vnd klagen / des rechten Kir-
chen

chen Gewitters / (als wie man
sich mit S. Paulo solle zu Gott
beferen / vnd in Gottes furcht le-
ben) ganz vergessen / so doch die
jeningen / die in warer Buß vnd
Glauben Gott fürchten / die zei-
chen des Himmels (wie obgemelt)
nicht fürchten dörfen / Vnd ha-
be solche Kirchenrechnung / de-
nen die solche arbeit lieben / zu
dienst vnd wolgefallen / kurz
verzeichnet / vnd in Druck gege-
ben. Ewer Ernohesten Herr-
schafft aber sonderlich *dediciret* /
vnd zugeschrieben / als meinem
alten günstigen Herrn / vnd
Freunde / des Christliche Gunst
vnd Freundschaft / mir zwar
sonsten / durch mancherley weise
vnd wege reichlich bekand / aber
son

sonderlich durch den Achtbarn
vnd Wolgelarten Herrn/ Mel-
chior Latomum / gewesenem Stad-
schreiber zu Breslaw / Welcher
gern zu Lieb vnd freundschaft
dienete / mündlich vnd schrift-
lich eingebildet worden / das ich
ob Gott wol / derselben nimer-
mehr vergessen / sonder^s je vnd
alle wege Christlich vnd ehrlich
zu räumen wil geflossen sein / vnd
dieselbe jziger zeit / mit gegewer-
tiger Dedicirung dis Tractet-
lins zu rügen vnd zu regen / auch
durch eines alten guten Freun-
des schreiben / das ich vnläng-
est vnter meinen Briuen gefun-
den / bin angereizt vnd verur-
sacht worden. Mit demütiger
freundlicher Bitte / E. E. Herr-
schafft

schafft / wolte solche geringe /
ja wollmeinende arbeit zu gu-
tem gefallen annehmen / vnd fer-
ner mein gunstiger Herr vnd
freund sein vnd bleiben. Hiemit
samt alle den Eweren / dem ewi-
gen gutigen Gott / in seinen Be-
terlichen schutz / bey rechter Wol-
fart Leibs vnd Seelen zu erhal-
ten / befohlen Gegeben zum Lau-
ben / Anno 1574. den Freitag
nach Pauli bekerung / nemlich
den 29. Januarij / an welchem ta-
ge vor 54. jaren / als Anno 1520.
zu Wien in Osterreich an Son-
vnd Monden schreckliche zeich-
en / auch wunder gestalte Regen-
bogen vnd Fewrige Balcken /
vber S. Steffans Kirchen ge-
sehen worden Darauff das ne-
hest

hest jar darnach ein grausame
Pestis erfolgt/darin viel Tau-
sent Menschen gestorben/ Auch
desselben nehesten jars die Tür-
cken in Ungerland gefallen/
Griechisch Weissenburg erobert
vnd eingentomen/ vnd sonsten
vmbher grossen schaden gethan/
Der Ewige gütige Gott wolle
vns für solchen vnd andern
schrecklichen Gesten gnediglich
behüten/ durch vnsern Herzog
Friedenreich Gottes vnd Ma-
rien Son Ihesum Christum/
Amen.

E. E. S.

Dienstwilliger
freund.

Sigismundus Schwabe/
Prediger zum Lauben.

Som Gewit-
ter/ des Tages Pauli Be-
ferung/ Aufss rechte Kirchen
gewitter gedeutet.

Die Alten Verss.

*Clara dies pauli, bona tempora denotat anni,
Si fuerint uenti, designant praelia genti,
Si fuerint nebulae, pereunt animalia quaeq;
Si nix & pluuia, designant tempora cara.*

Das ist:

Sanct Pauli klar / ein gutes jar/
Auff grossen Wind/ folgt Krieg geschwind /
Dem Nebelrauch / folget sterben nach/
Auff Schnee vnd Regen / kleiner Segen.

W Liebten Freunde im
Herrn Christo / Dieweil
gemeiniglich am tage Con-
uersionis Pauli, viel Leuthe
allein auff das Natürliche
W Ges

Gewitter sehen vnd gaffen / daraus /
was für zeit / ob ein gut oder böse jar
folgen solle / fast abergleubischer weise
rechnung machen / vnd dagegen auff
rechte Kirchen Gewitter / was die Pro-
pheten vnd Apostel ankündigen / Wie
S. Pauli Lehr vnd Exempel / mit was-
rer Buß vnd Glauben / mit Gottseli-
gem leben vnd wandel Christlich nach
zu folgen / vnd dem zorn Gottes seliga-
lich zu entfliehen sey / keine gedanken
haben / Wie die vnartige böse verkarte
Welt / fast alles umbzuleren / das gute
zu misbrauchen / das geringst zu welen /
vnd das beste zuiergessen pflaget / So
wollen wir auff dismal / vns vnd an-
dern zu gute / aus obgemelten alten
Versen / vom Gewitter des Tages
Conuersionis Pauli / ursache nemen /
aus den Biblischen Planeten / nemlich
aus den Schrifften der heiligen Pro-
pheten vnd Apostel / ein Geistlich Pro-
gnosticon / oder Computum Ecclesias-
ticum

aticum / Eine gewisse Kirchen rechnung stellen / darin eigentlich zu sehen / wie es beide vber frome vnd böse Leute zeitlich vnd ewiglich wittern solle.

Solche Lere gehöret fürnemlich in den dritten Artikel vnsers Christlichen Glaubens / nemlich in den Artikel von der heiligen Christlichen Kirchen / darin / als in der rechten Archa Noe / alle Busfertige gleubige Menschen / für dem schrecklichen vngewitter des zorns Gottes wider die Sünd / in Gnaden erhalten vnd selig werden / Davon wir die Summam wol fassen mügen / in den mercklichen Spruch Ezech. 33. Da Gott der H E R R selbst eine gewisse Practicam stellet / dieselbe mit einem tewren Eide bestetiget vnd spricht: So war als ich lebe / Ich habe keinen gefallen am Tode des Gottlosen / sondern das sich der Gottlose bekere von seinem we-

Bij sen

sen / vnd lebe. das ist: So war als
ich ewiger vnd Allmechtiger Gott bin/
der Himmel vnd Erden / vnd alles darin
geschaffen habe / auch regiere / vnd er-
halte / nach meinem willen vnd wolge-
fallen / So gewis vnd warhafftig
hab ich keinen gefallen / das irgent ein
Mensch auff Erden solt verderben vnd
dem Teufel zu teile werden / sondern
das ist mein ewiger vnd vnwandelbar-
er wille / Das alle / die sich in warer
Bus vnd Glauben zu reiner Lehr vnd
rechtem brauch der Hochwirdigen Sa-
crament halten / vnd zum zeugnis / das
ir Glaub kein Heuchlen sey / nach Chri-
sti vermanung / Matth. 5. ihr Liecht
für den Leuten leuchten / vnd scheinen
lassen / in der rechten Archen der waren
Kirchen / ewig in Gnaden erhalten vnd
selig werden.

Diese Practicam desto richtiger zu
vernemen / sollen wir allhier fürnemlich
von vier gedencck wirdigen Regeln be-
richt mercken. Vom

I.

Vom klaren Gewitter /
in Lehr vnd Leben.

II.

Von grosser Ungefügigkeit /
in Lehr vnd Leben.

III.

Vom stinckenden Nebel /
etlicher sonderlichen groben Sünden
vnd Laster.

IIII.

Vom alten Birgschnee /
vnd Spatregen der Unbusfertigen
Menschen.

Diese Regeln/in Gottes furcht zu
Obseruiren/helffe vns Christus der rech
te Morgenstern/ durch seinen Gnaden
glantz/durch den heiligen Geist/Amen.

I.

Die Erste Regel zeigt auff
B iij klar

Klar Gewitter in Lehre vnd Leben / vn-
sere Vorfahren / die lieben alten / aus
langer erfahrung haben gefagt / Wenn
am tage Conuersionis Pauli das Ge-
witter fein hell vnd klar ist / so solle ge-
meiniglich ein gut jar darauff folgen /
wie der alte Vers lautet / *Clara dies
Pauli, bona tempora denotat anni.* Das
ist / Sanct Pauli klar / ein guttes jar /
das lassen wir im rechten brauch bey
wirthen / denn die alten seind auch Leu-
te gewesen / von denen wir viel guts has-
ben . Aber die Kirchen Rechnung aus
den Schrifften der heiligen Prophez-
ten vnd Apostel ist viel gewisser. Nem-
lich / wenn das Kirchen Gewitter hell
vnd klar ist / das rechte reine Lehr / rech-
ter brauch der Hochwirdigen Sacra-
ment / vnd Gottselig leben / glimmen
vnd gleissen / leuchten vnd scheinen / da
folget ein gutes jar / oder gute zeit / zu
rechter Wolfarth an Leib vnd Seele.
Darumb ein jeder / der des klaren Kir-
chen

then Gewitters recht warnemen wil /
auff gemelte Notas oder Kennezeichen
der waren Kirchen fleissig mercken sol.
I Das erste Kennzeichen / ist die rech-
te reine Lehre / des heiligen Göttlichen
worts / im Gesetz vnd Euangelio gefas-
set in die Schrifften der heiligen Pros-
pheten vnd Apostel / dadurch sich Gott
seiner Kirchen genediglich offenbaret /
beides nach seinem Wesen vnd willen.
Wie denn Gott selbs / Esa. 8: auff sein
Gesetz vnd Zeugnis weiset / vnd saget /
Das alle die des nicht warnemen / die
Morgenröte der Gnaden nicht sehen
können / dahin auch der alte lehrer Am-
brosius weiset / da er saget : Ibi est Ec-
clesia, in qua apparet Deus, & loquis-
tur cum seruis suis. Das ist : Da ist die
rechte Kirche / in welcher sich der einige
ware Gott / durch sein Wort vñ Werck
genediglichen seinen Dienern offenba-
ret. Darumb / wo in der Lehre die Son-
ne der Gerechtigkeit / nemlich Christus

B iij

helle

helle scheinet / die Lehrer in der Kirchen
als die rechten Sternen / im richtig nach
folgen / nach dem Exempel Iohannis Ba-
ptista / auff in zeigen vnd weisen / Wie
S. Petrus in der Apostel Geschichte /
Cap. 10. saget: Dem H & X & z Chris-
sto geben Zeugnis alle Propheten / das
durch seinen Namen / alle die an in glet-
ben / vergebung der Sünden empfa-
hen sollen / da / da ist ein herrlich Zeich-
en / des klaren Kirchen Gewitters.

Weil aber der Erklügner / vnd
Mörder / (Wie in Christus Johan. 8.
recht intituliret /) der leidige Teuffel /
nicht feiret / sondern durch seine Egyp-
tischen Zuberer / Kottengeister / vnd
Schwermere allerley versuchet / das Kir-
chen Liecht / der reinen Lehr zu dempf-
fen / vnd aus zu leschen / vnd dagegen
grewliche Finsternis aus der Hellen ein-
zuführen / Wie solches in der Offenba-
rung Iohannis Cap: 9. wunder artig
abgebildet ist. So sollen beide Lehrer
vnd

vnd zuhörer desto vleissiger am Wort
Gottes halten/ vnd mit ernstem Gebet
dem gütigen Gott anliegen / das er sol-
chen Zeuberern wolle stewarten vnd weh-
ren / vnd ja die Sonne der Genaden /
dieweil der streit weret/ (wie zu Josuæ
zeiten / Cap: 10.) nicht vntergehen
noch verlassen / sonder Hell vnd klar
leuchten vnd scheinen lassen / bis wir
vns / durch Gott / an vnsern Feinden
rechen / vnd den Kampff seliglich vol-
lenden mügen .

2. Das Ander Zeichen des klaren
Kirchen Gewitters / stehet im rechten
Brauch der Hochwirdigen Sacra-
ment / denn wie Gott im alten Testa-
ment dem Abraham vñ seinem Volck /
neben dem Wort der Verheissung/ das
Sacrament der Beschneidung gege-
ben / zum gewissen Sigill der Gnaden
vnd kennezeichen der waren Kirchen /
des sich auch der liebe David wider
den grimmigen Feind den Goliath ges-

B v trös

tröstet/ vnd darauff getrohet/ I. Sam.
17. Also hat vns auch im Newen Tes-
tament der Son Gottes Christus vn-
ser Heiland die Tauffe/ Abendmal/ vñ
Absolution/ zur gewissen versicherung/
seines tewren Verdienstes/ vnd zu mer-
cklichem kennezeichen der Christlichen
Kirchen veordnet vñnd gegeben / deren
wir vns auch im kampf vnd streit wi-
der Sünde Tod vnd Teuffel / im Les-
ben vnd sterben zu rhümen vnd zu trös-
ten haben/ Wie diese von den heiligen
Euangelisten S. Mattheo / Marco /
Luca / vnd S. Paulo / nach der lenge
beschrieben sein/ bey welchen klarer vnd
warer bericht zu finden.

Wo nu die Hochwirdigen Sacra-
ment / nach Christi ordnung vñnd bes-
fehl richtig vnd rein gehandelt/ gereicht
vnd empfangen werden / Da ist ein
schön Zeichen des klaren Kirchen Ges-
witters zu sehen / Vnd weil demselben
der Teuffel durch sein Teuberer auch
auff

auff mancherley weise bey zu Fonten
versuchet/ sollen wir vns desto gewisser
vnd steiffer ans Wort halten/ mit dem
lieben David fleissig beten vnd sagen/
Psal: 119. Lucerna pedibus meis ver-
bum tuum &c. Dein Wort ist meines
Susses leuchte. Psal: 25. HERR
zeige mir deine Wege/ vnd lere mich
deine steige/ Leite mich in deiner War-
heit/ vnd lere mich ec. darbey auch die
Regel der Alten/ in der Lere von den
Sacramenten/ wol zu mercken/ Eccle-
sia nec materiam, nec formam Sacra-
mentorum mutare potest: das ist: Die
Kirche hat nicht macht an den hochwir-
digen Sacramenten etwas zu endern/
sondern wir sollen dem HERN Christo
sein Testament/ ordnung vnd befehl
vnuerselseth vnd vnuerruckt sein vnd
bleiben lassen.

3. Das Dritte Zeichen des klaren
Kirchen Gewitters/ stehet in gutem ges-
horsam der zuhörer/ gegen dem Heiliga-
gen

gen Predigampt / als wenn die Leute
fleissig zur Kirchen gehen / gerne Gotz
tes wort hören vnd lernen / dem Heiliga
gen Geiste nicht mutwillig widerstres
ben / sondern Christlich gehorchen vnd
folgen / dem lieben Gotte (wie Dauid
im 110. Psalm vermanet) im heiligen
Schmuck / nemlich im Glauben / vnd
guten Gewissen / willig opffern / Chris
sto irem Heiland / der sie erlöset hat /
trewlich dienen / in heiligkeit vnd gerech
tigkeit / die im gefellig ist / vnd also im
heiligen Leben vnd wandel (nach Chris
sti vermanung / Matth. 5.) Ir Liecht
für den Menschen leuchten vnd schei
nen lassen. Damit sich andere an inen
Spiegeln / vnd irem guten Exempeln
auch Christlich nach folgen mügen.
Dauon Gregorius saget: *Viua Lectio est vita sanctorum.* Das ist: Hei
liger Leute leben vnd wandel / ist ein le
bendiger Brieff / daraus jederman viel
Liechts vnd Berichts zum guten nemen
kan. Weil

Weil aber der Teufel auch durch
seine Zerberer versuchet / durch böser
leute ergerlich Leben / ist gemelt Liecht
zu verunreinigen vnd finster zu mach-
en / So sollen alle Gottliebende frome
Christen / die Liechtspuken des heiligen
Göttlichen worts stets zur hand haben /
in Gottes furcht wachen vnd beten /
vnd sich für ergerlichem leben fleissig
hüten. Denn es ist nicht genug / den
Christlichen Namen haben / sondern es
gehöret auch darzu / sich mit der that ei-
nen Christen beweisen: Wie Chryso-
stomus saget: In der Epistel ad Pauli-
num: Non Hierosolymis fuisse, sed
Hierosolymis bene vixisse laudan-
dum est. Das ist: Damit wird einer
wenig Lob erjagen / wenn er gleich zu
Jerusalem gewesen ist / Aber wenn ei-
ner zu Jerusalem sich recht vnd wol ge-
halten hat / nicht allein das heilige Grab
gesehen / sondern auch Christum / der
im Grabe gelegen / aus seinem wort fer-
nen

nen / anruffen / vnnnd mit Gottseligem
Leben vnd Wandel ehren lernen / das
ist lobens werd. Es ist nicht genug ein
Gliedmas der Kirchen heissen / sondern
wir sollen vns auch also lebendige glied
mas der waren Kirchen erzeigen / zu
Gottes lob vnd ehren.

Wo nu solche Zeichen des Klaren
Kirchen Gewitters erscheinen / da hat
man auch auff gute zeit / nemlich / auff
rechte Wollfart Leibes vnd Seelen / ge-
wisse Rechen schafft zu machen. Wie
Salomon Prouerb. 2. zeuget / vnnnd
spricht Der HERR GIBET Weisheit /
vnd aus seinem Munde kömpt erkent-
nis vnd verstand. Er lest den auffrich-
tigen gelingen / vnd beschirmet die fro-
men / vnd behütet die / so recht thun / vnd
bewart den Weg seiner Heiligen / das
ist / in der waren Kirchen Gottes / bey
reiner Lehr vnnnd rechtem Brauch der
Hochwürdigen Sacrament / ist reicher
Segen / Glück vnd Wollfart / Nema-
lich /

lich/Rechte erkentnis Gottes/nach seinem Wesen vnd willen Gleubiger trost von genediger vergebung der Sunden/Schenckung des Heiligen Geistes/mit mancherley schönen Gaben / Schutz vnd Schirm in aller not vnd fahr / im Leben vnd Sterben/ vnd Summa/da ist eitel Gnad/ leben vnd Seligkeit.

Es müssen zwar die fromen Christen in der Kirchen Gottes auff Erden/ auch mancherley Ungewitter/ Sturmwinde / vnd schwere Plakregen mit gewarten/mancherley Creuz vnd Trübsal/ jamer vnnnd Not ausstehen / Wie Alt vnnnd New Testament/ durch klare Sprüche vnd merckliche Exempel zeugen/ Vnd S. Paulus 2. Tim. 3. Aus eigener erfahrung leret vnd zeuget / Das alle die Gottseliglich leben wollen / in Christo Ihesu / müssen verfolgung leiden/Aber der trewe Gott wil die seinen nicht verlassen / Sondern genedig beschützen vnd bewaren. Er kan die Finstern

stern Wolcken / vnnnd schweren Unge-
witter bald zutreiben / vnnnd widerumb
schön Wetter geben / das man getrost
singen vnnnd sagen mag: *Post nubila*
Phæbus. Nach dem Regen kömpt Son-
nen schein. Wie sich Sara Raguels
tochter / folgendes des jungen Tobiaë
Braut / Tob. Cap. 3. in irem Creuze
tröstet vnnnd sprach: *HERR GOTT* /
nach dem Ungewitter ledestu die Son-
ne wider scheinen / vnd nach dem Heu-
len vnnnd Weinen / vberschüttestu vns
mit Freuden. Auff welchen Trost /
auch David weiset im 77. Psalm / da
er saget: *Dextera excelsi, hæc omnia mu-*
tare potest. Die Rechte Hand des
Höchsten / kan das alles endern / Dar-
umb alle die sich solche Ungewitter
nicht lassen abschrecken / sondern ires
beruffs / frewlich vnd bestendig abwar-
ten / sich durch gleubigen Trost / vnter
den Schutz vnd Schirm Gottes ber-
gen / in gedult sich dücken vnd bücken /
schmie-

schmiegen vnd biegen/ vnd das Unges
witter für vber rauschen lassen/ denen
wil der H^{er}re mit gnade vnd hülffe
erscheinen/im leben vnd im sterben.

Freilich ereuget vnd erzeiget sich /
ein gefertliche vnd beschwerliche Zeit /
darin es von mancherley Trübsaln /
die sich hin vnd wider erheben/beginnee
in der Welt fast Finster zu werden /
vnd nach des H^{er}ren Christi Weissas
gung genugsam Zeichen vorhanden
sein / dabey zu schliessen / das der Jünz
gste tag nicht ferre sein könne / Vnd
viel gelerte Leute sonderlich auff das
1 5 8 8. jar zielen vnd weisen / das
vmb dieselbe zeit / (Wo nicht ehe) der
jüngste tag zu vermuten sey. Wie die
deutschen Reimen lauten/ vnd wol zu
mercken.

Merck/Wenn man schreibt Achtzig vnd acht/
Dasselbe jar gar wol betracht /
Seht da die ganze Welt nicht vnder/
So geschicht doch sonst gros mercklich wunder.

E Aber

Aber wie dem allen / weil wir / laut
der wort Christi / den tag vnd stunde
seiner letzten zukunft nicht wissen kön-
nen noch sollen / Aber des gewis sein /
das er nicht aussen bleiben / vnd vmb
der Auserwelts willen / schnell herzu
eilen wird / in des aber die grossen trüb-
saln / vmb der vieler Sünde willen /
wachsen vnd steigen / sich gewaltig heuz-
fen vnd mehren / bis endlich im grossen
Wetter / Himmel vnd Erden in hauffen
fallen / vnd alle Element im Fwur zu
schmelzen werden. So sollen wir im
Schatten der Kirchen beten vnd sagen:
H E R R / dein Wille geschehe. Item /
wir sollen vns wider allerley furcht vnd
schrecken / angst vnd not / im leben vnd
sterben / mit gleubigen Trost verdecken
vnd verhüllen / vnuerzagt / dem Teufel
vnd seiner Windesbraut / der Gotts-
losen Welt zu troste / Singen vnd sa-
gen.

Dück dich / laß für vber gahn /
Das Wetter wil sein willen han.

Item /

Item: *Vite fautor Deus,*
Auxiliator meus.

Das ist: Mein Gott/der das Leben liebet vnd gibet/wird mich mit trost rath vnd hülffe nimmermehr verlassen/Sondern mir genediglich durch vnd aushelffen/im Leben vnd im Sterben/vnd endlich mein Leib vñ Seel genediglich bewaren zum Ewigen leben. Dabey zu mercken / das in ißgemeltem Lateinischen Sprüchlin / durch die Zallsbuchstaben/auff das I 5 8 8. jar gezeigt/vnd durch den Inhalt der wort/(wie gemelt) starcker trost / wider allerley not vnd fahr geweißt wird.

Nach dem letzten Wetter aber / wenn wir in das rechte Gelobte Land heim komen/ da wird der rechte fröliche Sommer angehen / vnd die Sonne der Gnaden ewig vber vns leuchten / vnd scheinen / darinn wir mit vnaussprechlicher Frewd vñ Herrlichkeit alles leids reichlich sollen ergetet werden.

E ij Wie

Wie vns der König/vnd Prophet Das
uid aus reichem Geiste Gottes / im 16.
Psalm / gar tröstlich erinnere / da er sa-
get: H & R R / du thust mir kund / den
Weg zum Leben / für dir ist freude die
fülle/vnd lieblich wesen / zu deiner Rech-
ten ewiglich. Vnd S. Paulus Rom. 8.
sagt: Ich halte es dafür / das dieser zeit
leiden nicht werd sey / der grossen Herr-
lichkeit / die an vns sol offenbaret wer-
den / Des wir auch in der Herrlichen
vnd freudenreichen verklerung Christi /
Matth. 17. Marc. 9. Luc. 9. ein wunder-
schönes vnd tröstliches Bilde haben /
da die lieben Jünger ober der verkles-
rung Christi / auff dem Berge Thas-
bor / mit solcher wonne vnd freude er-
füllet worden / das sie von herzen wüns-
schen / inen alda Hütten oder Wonun-
gen auffzurichten / vnd stets alda zu
bleiben. Wie solches auch der heilige
Augustinus in gleubiger hoffnung gar
herrlich rhümet / vnd spricht: O aeterna
fa-

foelicitas, ubi est superfluitas omnium bonorum, iocunditas omnium beatitudinum. & de his aeterna securitas. Das ist. O du ewige Seligkeit vnd fröligkeit / wie herrlich vnd köstlich mustu sein / weil in dir alles Gutes ein Ueberfluß / vnd alles seligen dinges ein lieblichkeit ist / vnd man des gewis vnd sicher ist / das es ewig weren / vnd kein auffhören haben wird.

Was aber für ein gewlich vngewitter vber die Gottlosen zeitlich vnd ewig folgen solle / wird in den nachfolgenden dreien Regeln erkleret werden.

II.

Die Aunder Regel / weist auff grosse vngestümigkeit / vnd zwistracht / in Lehr vnd Leben. Denn wie die Alten gesagt haben / wenn an S. Pauli tage grosse vngestüme Sturmwinde sich erheben / so solle gemeiniglich dasselbe jar gros Krieg vnd empörung

E iij

rung

zung folgen / wie der alte Vers lautet:
Si fuerint venti, designant praelia genti.

Das ist: Dem grossen Wind /
folget Krieg geschwind.

Welches freilich auch im rechten
brauch nicht zuuerachten / Aber des
Mannes / deme Wind vnd Meer ges
horsam ist / sol ja nicht vergessen wer
den.

Also setzen wir auch in vnser Geists
liche Practica / oder Kirchen rechnung.
Wo sich bey den Menschen Sturm
winde mit vngestümigkeit vnd zwis
tracht in Lehr vnd Leben erheben / da
folget gewislich grosse vnruhe / vnfried /
vnd krieg in den Herzen vnd Gewissen
der Menschen / dadurch viel am rechten
erkentnis Gottes / am Gebet / vnd Got
tes dienst geseumet / an rechter Wolfare
verhindert / vnd in gros jamer vnd no
gefüret werden. / das sie sich vnd andere
beleidigen / mit eitel vnmut / forcht vnd
schrecken jr Leben zubringen / mit angst
vnd

vnd verzweinelung sterben / vnd zu
gleich mit Leib vnd Seel versterben.

Denn wie ein grosser Sturmwind
einen hauffen Staubs erhebet / mit
grosser vngestümigkeit durch einander
jaget / vnd wider von einander treibet /
das niemand weis wo eins / oder das
ander steubet / oder fleuget / auch offters /
grosse Heuser vnd Türne / oder ander
hohe Gebew in hauffen wirfft / hohe ge-
waltige Bäume in Gärten vnd Wäl-
den / mit sampt den Wurkeln aus der
Erden reisset / vnd zu boden schleget.
Wie man des viel mercklicher Exem-
pel hat. Also kan auch der grawsame
gewaltige Nord vnd Nord wind / der
leidige Teuffel / durch seine Blosensäl-
ge / vnd Windesbreute / nemlich / durch
die Schwermer vnd Rottengeister / in
den ohren vnd herzen der zuhörern / viel
staubs vnd vnflats erregen / bewegen /
vnd durch einander jagen / dadurch ire
augen des Gemüttes / dermassen vera-

E iij

finstert.

finstere werden / das sie weder Gott
noch sich selbs kennen / weder aus noch
ein wissen / sondern auff mancherley ir-
rewege in Lehr vnd Leben geraten / ei-
ner hie / der ander dort / schrecklich zu bos-
den fallen / vnd durch solche Sturm-
winde / nicht allein geringe schwache
leute / sondern auch viel hohe / starcke
gewaltige Herrn / Fürsten / König vnd
Keiser / umbgerissen vnd niedergeschla-
gen werden. Darumb die Schwärmer
vnd Kottengeister / in der andern Epist.
Petri Cap: 2. nicht vnbillich einem
vngestümen Wirbelwinde verglichen
werden.

Solches verhenget vnser lieber
H. Erre Gott vber die Welt / nicht one
vrsachen / Sondern / Erstlich darumb /
das der Welt vnd anck für Gottes wort
gestrafft werde / Denn wenn man der
reinen Lehre nicht achtet / oder müde
vnd vberdrüssig wird / vnd dagegen
gerne was neues haben wil / so verhen-
get

get Gott aus gerechtem zorn / dem
Teuffel vnd seinen Blasebälgen / das
sie den leuten mancherley irthumb ein-
blasen / vnd viel vbelts stifften / grosse vns-
einigkeit vnd zwiſſtracht in Lehr vnd Le-
ben anrichten. Davon geschriben ste-
het ein wunder mercklicher Spruch / in
der andern Epistel S. Pauli / an die
Thessalonicher Cap. 2. Dafür / das sie
die Liebe zur Wahrheit nicht haben ans-
genommen / das sie Selig würden / Wird
inen Gott kreffrige irthumb senden / das
sie glauben der lügen / Auff das gerich-
tet werden / alle die der warheit nicht
glauben / sondern haben lust an der vns-
gerechtigkeit.

Zum Andern / verhenget Gott sol-
che Sturmwinde auch darumb / auff
das er seine gleubigen auff die Proba-
sehe / damit offenbar werde / ob sie leicht
oder schwer sind / ob sie auch durch ei-
nen jeglichen Wind zu erheben sind /
Ja / das wir vnd andere innen werden /
E v wie

wie leicht wir seind / wenn Gott sein
Gewicht ableget / vnd widerumb wie
schwer wir sind / wenn vns Gott bey
stehet vnd zu leget / an denen der Teu-
ffel vnd seine Apostel ein schwere Poes-
se / vnd sich bis an tod daran verbrech-
en müssen. Auff welche ursache Moys-
ses zeigt. Deut. 13. da er saget: Wenn
ein Prophet oder Trewmer vnter euch
wird auffstehen / so soltu inen nicht ge-
horchen / denn der H E R R ewer Gott
versucht euch / das er erfare / ob jr in von
ganzem hertzen vnd von ganker Seele
lieb habet / Vnd S. Paulus I. Corin.
II. sagt. Es müssen Kotten vnter
euch sein / auff das die / so rechtschaf-
fen sind / offenbar vnter euch werden /
Vnd hieher gehört auch das Sprich-
wort der Alten / *Hereses sunt purga-
menta Ecclesie*. Das ist / Die rechten
Gliedmas der waren Kirchen / müssen
durch Kotten vnd Secten gepankerfes-
get vnd gereinigt werden.

Zum

Zum Dritten / verhenget Gott
solche Sturmwinde / auff das wir
desto mehr in die Schrift gejagt / vnd
desto fleissiger zum Studiren verursa-
sacht werden / Wie Cherintus den
Euangelisten Johannem / Arrius
vnd sein Anhang / den fromen Bis-
choff Athanasium / Tegel mit seiner
Ablass fram / den lieben Lutherum / vnd
andere / in die Bücher gejagt / vnd auff-
gemuntert haben / Also werden noch
heute durch die Kottengeister / vnd
Schwermer / viel fromer Leute in die
Bücher gejagt / vnd desto fleissiger Pres-
dig zu hören verursachet / das heist / wie
Esaie 28. geschrieben steht: *Vexatio dat
intellectum.* Anfechtung lernet auff's
Wort merken.

Zum Vierden / lest Gott solche
Sturmwinde darumb komen / auff das
man auch darbey erkennen solle / das
der jüngste Tag immer herbey kome.
Denn wie es mit dem natürlichen Ges-
witter gehet / je neher dem jüngsten tage /

ic

je mehr vnd grösser vngestümigkeit des
Windes / zu Wasser vnd zu Lande / mit
grossen sausen vnd brausen. Also auch
je neher der letzten zukunfft des HERRN
je neher vnd grösser Vngestümigkeit /
vnd Zwitteracht / in Lehr vnd Leben.
Wie der HERR Christus selbs / solches
beides / als vorgehende Zeichen / des
jüngsten Tages / angekündiget hat.

Matth. 24. Marc. 13. Luc. 21.

Darauff nu sonderlich wol zu merz
cken / Was denn eigentlich auff solche
Sturmwinde / den Gottlosen folgen
solle. Nemlich / verblendung ires Her
zens / das sie weder Gott noch sich selbs
kennen / Verlierung aller Wolfart /
leibs vnd Seelen / Vngedult / darüber
sie sich mit Gott vnd dem Nehesten /
auch mit sich selbs zanken / rechten /
fechten / kriegen vnd streiten. Ein vn
rühig / furchtsam / erschrocken / gejagt /
geplagt / vnd flüchtigs gewissen / im Le
ben vnd Sterben / vnd ewig werenden
jamer /

Jamer/marter vnd pein im Hellischen
feyr. Davon Gott der HErr selbs
zeuget/vnd spricht: Esa. 66. Ir Wurm
sol nicht sterben / ir Feyr sol nicht ver-
leschen / Gegen welchem jamer nichts
schrecklichers mag gesaget werden.
Darumb wol allen / die sich in solcher
Vngestümigkeit in guter acht halten/
Nach der vermanung Christi/Matt. 7.
sich für den falschen Propheten fürsee-
hen / vnd nach der trewen Warnung /
des Euangelisten vnd Apostels Johan-
nis / Epist. 1. Cap. 4. Die Geister / ob
sie aus Gott sind / prüfen vnd kennen
lernen / Wenn der Teuffel ein Vnges-
tümigkeit erreget / sie sich ja mit dem
lieben Catechismo wol verwaren / da-
mit inen der Erzböswicht nicht aller-
ley staub/kot/vnd vnflath / in ire augen
vnd herzen steube / sondern mit klaren
hellen Augen vnd reinem Herzen ge-
sund vnd selig erhalten werden.

Die

III.

Die Dritte Regel / zeigt
auff den Stinckenden schiedlichen Nes-
bel/etlicher fürnemen groben Sünden/
vnd Laster.

Die Alten haben gesagt: Wenn
am tage *Conuersionis Pauli* ein stinckens-
der Nebel felt / das sol dem folgenden
jare / ein gros sterben deuten / beide dem
Vihe vnnnd Menschen / Wie der alte
Vers lautet:

Si fuerint nebula, pereūt animalia quaeq̃.

Dem Nebelrauch / Folget sterben
nach / Welche Regel offters / durch die
Erfahrung ist bestetigt worden.

Aber in der Geistlichen Practica /
ist diese Regel viel gewisser: Wenn ein
grewlicher stinckender Nebel / von bö-
sen dünsten / aus der Erden auff stei-
get / verstehet: Wenn allerley grobe
Sünden vnd Laster / als die rechten bö-
sen / stinckenden / giffügen Dünste / aus
der

der Hellen auffsteigen/ vnnnd vberhand
nemen / da folget freilich gros sterben/
nemlich / schrecklicher vntergang der
Thier vnnnd Menschen / durch Krieg /
tewrung/ Pestilens/ vnd andere schreck-
liche Plagen/ durch welche Land vnnnd
Stede/ Dörffer vnd Flecken/grewlich
verwüestet werden .

Denn ob wol ein jegliche Sünd
wider Gottes Gebot / so gros vnnnd
schwer/so giftig vnnnd schedlich ist/ das
Gottes zorn vnnnd straffe dadurch ver-
ursacht wird / so seind doch vnter an-
dern etliche sonderliche grobe Sünden
vnd laster / die mit irem gestanck / His-
mel vnd Erden erfüllen / vnnnd grossen
jamer vber den ganken Erdbodem ein-
füren .

Das Erste heist Abfal / von der
erkanten warheit. Wenn die Leute ent-
weder aus furcht/ oder aus wollust/ an-
dern zu gefallen/oder aus fürwitz/dz sie
was sonderlichs sein/ vnd machen wol-
len/

len/ von Gott vnd seinem wortte abfal-
len/die erkante warheit verleugnen vnd
lestern. Wie die Israeliten zu den
Töchtern der Moabiter sich gesellet/
vnm waren Gott abgewichen sein/vnd
die Heidnischen Götzen geehret haben.
Num. 25. Dergleichen auch viel Jüden
der Babilonischen Gefengnis theten.
Item/ Julianus der Römische Keiser/
welcher den Christen Glauben ver-
leugnete / grēwlich lesterte vnd verfolg-
gete/ Vnd ein grosse Gesellschaft nach
sich gelassen hat.

Das Ander / ist die Fleischliche
Wollust/ in schendlicher Hoffart/ vna-
nützem pracht / fressen vnd sauffen/ Es-
hebruch/ Hurerey/ vnd allerley vnzucht
vnd leichtfertigkeit/dabey man Gottes
vnd des Nehesten gar vergisset / vnd
vnerschrocken das Epicurer Liedlein
singer.

*Ede, bibe, lude: post mortem nulla
voluptas.*

(Huy)

Huy/ Friß vnd Sauff/ Spiel/ leb
im Saus /

Denn nach dem Tod wird nichts
mehr draus.

Dadurch freilich viel frome Herzen
gar sehr geergert oder betrübet werden.

Das Dritte ist die schendli-
che verachtung des Heiligen Göttli-
chen worttes / Da man aus Gottes
wort spot treibet / die armen Prediger
auff's greulichst schandfleckt vnd vn-
ehret / alle ernste Buspredigten verach-
tet / vnd so viel darnach fraget / als wenn
eine Gans pfiffe // Wie solches vor der
Sündfluth / Item / zu Jerusalem vor
der Belegerung / vnd bey andern Völ-
ckern sehr gemein gewesen / vnd leider
Gottes ikund fast in aller Welt sehr
gemein wird.

Das Vierde ist Tyranny / vnd
allerley misbrauch der hohen Gewalt
vnd Empter. Da man nicht allein
Gottes wort / mit aller guter Zucht vnd

D

discis

Disciplin mutwillig verachtet / sondern
auch frome vnschuldige vnnnd woluer-
diente leute hasset / verfolget vnd schends-
lich auff die Fleischbanck opffere / Da
man Cainische opffer / Saulitische
Heyrathen / Absalonische Gastereien /
Herodische Pancket / vnnnd Parisische
Hochzeiten anrichtet / vnd das Licht der
Göttlichen warheit ganz vnd gar / mit
höchster Gewalt / zu dempffen versu-
chet .

Das seind (wie gemelt) vnter allen
andern / die grösten vnnnd gröbesten
Sünden vnnnd Laster / die grewlichen
Neblichten / stinckenden / giftigen vnd
shedlichen Dünste / die gewislich der
Erkstencker / der leidige Teuffel / aus
dem Abgrund der Hellen herauff füh-
ret / vnd damit die ganze Welt durch-
stencet / vnd dermassen vergiffet / das
freilich Laub vnd Gras / sampt andern
früchten / vnd Geweachsen / auch Viehe
vnd Menschen dauon sterben vnd verz-
terbett

terben/ Den vmb solcher grossen gewalt-
lichen Sünden willen Gott der H. Er-
den ganken Erdboden verfluchet vnd
vermaledeiet / vnd mit allerley schreck-
lichen plagen erfüllet / dadurch Land
vnd Stedte / gewaltlich verwüstet wer-
den.

Solche betrübe vnd trawrige Zeit /
darinn fast alle Welt / vmb gemelten
Sünden willen / mit allerley schrecklich-
en plagen / vnd grossen Trübsaln er-
füllet ist / nennet Gott selbs einen Tag
des Nebels *Zophonia Cap. 1.* Da Gott
seinem Volck seinen zorn vnd folgen-
de Straffe ankündiget / vnd spricht :
Dieser Tag / ist ein Tag der Wolcken
vnd Nebel etc. anzuzeigen / Wie in sol-
chen schrecklichen Trübsaln / den Gott-
losen / ire Augen vnd Herzen / durch
furcht vnd schrecken / dermassen versin-
stert werden / das sie keinen Trost noch
hülffe ersehen noch erblicken können .
Wie Salomon in seinen Prouerbijs /

D ij

Cap.

Cap. I. ausdrücklich meldet / das Gott
den verechtern seins worts / vnnnd allen
mutwilligen leuten drewet vnd spricht :
Sie werden mich ruffen / aber ich wer-
de nicht antwortten / Sie werden mich
früe suchen / vnd nicht finden / darumb
das sie hasseten die lere / vnd wolten des
HErrn furcht nicht haben / wolten mei-
nes Raths nicht / vnd lesteren alle mei-
ne straffe etc .

Darumb wol allen / die sich für dem
stinkenden vnnnd giftigen Rebel des
Gottlosen Sündlichen wesens verber-
gen / sich solcher grewlichen Sünden
nicht theilhaftig machen / sondern sich
in die Hütten der Kirchen halten / mit
dem lieblichen Geruch des Opffers
Christi / im Wort vnnnd Sacrament /
sich erquicken / vnd nicht mit der Gott-
losen Welt / im Hellschen Nebel er-
sticken.

IIII.

Di Bierde Regel / weist
auff

auff den alten Birgschnee / vnd Spat
Regen / der vnbusfertigen verstockten
Menschen.

Die Alten haben gesagt: Wenn
am tage Pauli Bekerung gros Schnee
oder Regen gefellet / so soll gemeinlich
ein tewr Jar folgen / Wie der alte
Vers lautet.

Si nix & pluuia, designant tempora cara.

Dem Schnee vnd Regen/
folgt kleiner Segen.

Welche Regel auch in irem werd
bleiben mag / mit solchem Bericht / das
Gott alles in seinen Henden hat.

Aber in vnser Kirchenrechnung
find sichs gewis / das auff vnbusfertige
verstockung / verharrung vnd verstar-
rung in Sünden / Zeitlichs vñ Ewigs
verderben folget / Wie vns solchs durch
zwey schöne Gleichnis vom alten Birg
schnee / vnd Spat Regen gar merklich
furgebildet wird.

Das Gleichnis vom Schnee / zeis

D iij gee

get / Erstlich in gemein auff den Aus-
satz der Sunden/in des Propheten He-
lisei vngetrewen Knechte Gehasi / mit
dem Aussatz beladen / abgebildet / von
deme 4. Reg:5. stehet Das sein Aussatz
sey gewesen wie Schnee. Darnach
wird durch den Schnee auch sonderlich
gezeiget auff die wilden frechen leute /
die sich wie die wilden Bestien grim-
mig vnd böse erzeigen. Denn wie im
harten Winter/wenn der Schnee gros
ist / die wilden Thier grimmig vnd bö-
se sein / also das sie grausam wütten
vnd toben/beide Viehe vnd Menschen
beschädigen / also beginnen auch in
dieser letzten zeit / viel Menschen in der
Liebe zu erkalten/das sie grimmige wil-
de Bestien werden / vnd ganz vnge-
stümme vmb sich reissen vnd beißen. Item/
wie gemeiniglich der Birgschnee / hins-
der den Hügeln vnd Bergen / in hohlen
Grüfften vnd Klüfften / da die Sonne
nicht hinzu kan / lange dawret / vnd fest
liget /

liget / Also pflegen auch die Gottlosen
Menschen / hinder den Hügeln vnnnd
Bergen / in den hohlen Grüfften vnnnd
Klüfften / das ist / zwischen den Fleisch-
lichen wollüsten / irdischen Gütern / ho-
hen Gewalt vnd Herrlichkeiten / da die
Sonne der Gerechtigkeit nicht hin
scheinet / gar lange zu tawren / vnnnd fest
zu liegen / Ire Bus von einer zeit zur
andern sparen / vnd so fort an in Sün-
den zu verharren vnnnd zu verstarren /
bis sie endlich zum Teuffel hinfaren /
Endlich wie der Birgschnee / so lange
ligt / bis dz er durch einen starcken Law-
wind / oder grossen Plakregen gewons-
nen / erweichet / vnnnd weg geschwemmet
wird / also pflegen auch die Gottlosen
verstockten Leute zu warten / bis inen /
wie den Sodomitern / Fewr vnnnd
Schwefel auff ire Köpffe regenet / wie
David im 11. Psalm / allen Gottlosen
erschrecklich drowet / vnd spricht : Der
H E R R wird regenen lassen / vber die

Q iij

Gott.

Gottlosen / Blitz / Fehr vnd Schwefel /
vnd wird inen ein Wetter zu lohne ges
ben / davon auch in Hiobs Historien
stehet / Cap. 20. Der HERR wird
vber den Gottlosen Regnen lassen / sei
nen Streit etc. dabey die gemeine Re
gel von Gottes Ordnung / in seinem
Gerichts Proceß zu mercken. *Verbum,*
mina, Virga, ignis. Das ist: 1. Gott lest
sein Heiliges Euangelium / von Gnad
vnd hülffe in Christo / trewlich in aller
Welt ausbreiten. 2. Er lest auch die
vngehorsamen durch sein Wort vnd
wunder Zeichen fleissig warnen vnd bes
drewen. 3. Item / Er wirfft vnd schlegt
/ offters mit Peitschen vnd Prügeln / vn
tern hauffen / die mutwilligen Leute zu
zuchtigen vnd zu straffen. 4. Wo denn
solchs alles nicht helffen wil / so mus
endlich Hellsch Feuer darauff folgen /
dadurch die Gottlosen schrecklich auff
gerewmet / vnd in Abgrund der Hellen
hinunter geschwemmet werden. Dar
umb

umb wol allen / die sich Gottes wort
vnd Geist mit dem Sonnen schein der
Gnaden / in der zeit erweichen / erheben
vnd bewegen lassen / das sie sich mit
ernst / je ehe / je besser / zu Gott befe-
ren. Wie David im 95. Psalm ver-
manet / Heute so jr die Stimme Got-
tes höret / so verstocket ewre Herzen
nicht.

Eben darauff zeigt auch das
Gleichnis vom Spaten regen / Näm-
lich auff die Spate Busse / da man die
Busse gar zu lange auffzeucht / Denn
wie der Spat Regen / als der in der bes-
sten Erndte gefellet / mehr schadet
denn nuzet / also ist es auch mit der
Spaten vnd lang auffgezogenen Bus-
se sehr gefehrlich / Wenn man mit der
Bekering lang harret / bis Gottes
Zorn recht anbrennet / vnd die Plagen
schon vber vnd vber gehen / so ist Gott
denn nicht balde zu erweichen / noch zu
erbitten / sondern man mus darnach

D v deste

deste heisser vnd lenger baden. Wie
Gott der Herr selber mit ernster ver-
manung zeuget vnd spricht: Jerem: 6.
Besser dich Jerusalem / ehe sich mein
Herz von dir wendet / vnd ich dich zum
wüsten Lande mache / darin niemands
wone. Davon auch S. Augustinus saz
get: *Non facile inueniuntur presidia in
aduersitate, que non fuerint quesita in
pace.* Das ist: Wer nicht in der zeit
der Gnaden vmb hülffe ansuchet / dem
wird hernach im Ungewitter langsam
vnd schwerlich auffgemacht. Wenn
man jmer drücket vnd harret / bis einem
der Tod auff der Zunge siset / so gehets
gemeiniglich / wie mit jenem Bürger zu
Torgaw / des der Herr Doctor Luther
seligen / in seinen Schrifften gedncket /
der auch in Sünden verharret / Gottes
wort vnd Sacrament verachtet / bis
im die Seele wolt ausfaren / erst das
mals hies den Pfaffen holen / aber ehe
im der Priester das Sacrament reich-
et /

et/oder gleich wie ers im reichen wolte/
dahin starb vnd vertarb/ vielen andern
hartneckichten leuten/ zum mercklichen
Spiegel. Es ist wol war / das auch
die Spate Busse / so sie mit rechtem
Ernst geschicht/ vnd von herten gehet/
gnad erlanget / Wie des busfertigen
Schechers Exempel / vnd viel schöne
Sprüche zeugen. Darumb keinem
Menschen / so sich nahe vor seinem
Ende bekeret / Gottes genade zuuersa-
gen. Aber es ist gar schwer vnd sehrlich
erstlich in der letzten stund / in grosser
angst vnd not / sich mit solchen grossen
dingen ernsthaftig vnd hertzlich be-
kümmern / damit wir sonst vnser le-
ben lang gnug zuthun haben. Dar-
umb auch die Alten gesagt haben: *Pæ-
nitentia vera nunquam sera sed raro est
vera.* Das ist: Rechte ware Busse/ kan
nicht so spat komen / das sie nicht gnad
vnd hülffe erlanget / Aber spate Busse/
die man aus lautern mutwillen auffges-
zogen

zogen/ ist selten richtig. Darumb Sprach
Cap. 5. gar treulich je ehe je besser/
ernste Busse zu thun vermanet / da er
saget: Verzeuch nicht dich zum HErrn
zu beferen / vnnnd schieb es nicht von eis
nem tage zu dem andern / Denn sein
Zorn kumpt plözlich/vnd wirds rechen/
vnd dich verderben.

Welche nu ire Busse also sparen /
das sie mutwillig in Sünden verharz
ren/ verstarren / vnnnd one Busse dahin
faren/die komen freilich in grosse Tewa
rung vnnnd Hungers not / da sie aller
Wollfart Leibs vnnnd Seelen gantzlich
beraubt / im Abgrund der Hellen / in
Helligher. Marter vnd Pein sitzen vnd
schwizen/ brennen vnd braten/schmelz
ken vnd triessen/hungern vnd dürsten/
vñ in ewigkeit kein Labetrüncklin / noch
andere erquickung erlangen / Wie solz
ches Luc. 16. an dem Reichen Manne
in der Hellen qual / gar kleglich vnnnd
schrecklich abgebildet ist. Darumb wol
allen/

allen/die des rechten Gewitters im Bes
naden Soñer fleissig warnemen / wie
die Amessen ire Körnlin / nemlich Lehr
vnd Trost / fleissig eintragen / vnd ein
samlen / deren sie in der not / im Leben
vnd Sterben / mit reichem safft vnd
kraffe wol geniessen / vnd dauon ewig
gesund vñ starck / satt vnd selig werden.

Das seind also furz vier gemeine
Regeln / im Kirchen Gewitter wol zu
mercken.

I.

Vom klaren Gewitter /
in Lehr vnd Leben.

II.

Von grosser Ungestrimigkeit /
in Lehr vnd Leben.

III.

Vom stinckenden Nebel /
etlicher sonderlichen groben Sünden
vnd Laster.

Vom

Vom alten Birgschnee /
vnd Spatregen der Unbusfertigen
Menschen.

Der Ewige / Allmechtige /
güttige Gott / Vater vn-
fers H Erren vnd Hei-
lands Ihesu Christi / der das
ganze Firmament / vnd alle E-
lement / sampt allen Creaturen
in seiner Hand hat / kan Regen
vnd Segen geben / Leiblich vnd
Geistlich / zu rechter Boffart
Leibs vnd Seele / der wolle vns
Gnade verleihen vnd geben /
Das wir seinen lieben Son
Ihesum Christum / als den rech-
ten Morgenstern / kennen vnd
ehren


ehren lernen / damit wir beim
rechten Tage Liecht / im rechten
erkentnis des Heils erhalten /
vnd selig werden / Durch
den heiligen Geist / den
rechten Gnaden
glantz /

A M E N.

Andreas Muscellas

[Faint, illegible handwritten text, likely bleed-through from the reverse side of the page]





ALVENSLEBEN

Ad

612



Computus Ecclesia-
sticus,

Gewisse Kir-
chenrechnung / Aus den
Schriften der Heiligen Pro-
pheten vnd Apostel/wie es eigentlich
uber frome vnd böse Leute
zeitlich vnd ewiglich
wittern solle.

Gestellet / Durch
Sigismundum Sueuum
Freistadiensem,

Wittenberg.

1574.

26

